

KHUTBAH JUMAAT

“PELAKSANAAN IBADAH KORBAN DAN HIKMAHNYA”
(6 Jun 2025M/ 9 Zulhijjah 1446H)

الْحَمْدُ لِلَّهِ، الْحَمْدُ لِلَّهِ الْغَنِيِّ الْحَمِيدِ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ
لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.
اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ
مُسْلِمُونَ.

Kaum muslimin yang dirahmati Allah,

Marilah kita bersama-sama mempertingkatkan keimanan dan ketaqwaan kepada Allah *subhanahu wata'ala* dengan melaksanakan segala perintah-Nya dan meninggalkan segala larangan-Nya. Semoga kita memperoleh kejayaan dan kebahagiaan di dunia dan di akhirat. Pada hari ini, khatib akan membicarakan khutbah yang bertajuk: '**Pelaksanaan Ibadah Korban Dan Hikmahnya**'.

Kaum muslimin yang dirahmati Allah,

Pada hari ini, umat Islam dari seluruh pelusuk dunia telah berada di Mekah untuk melaksanakan kewajipan ibadah Haji. Bagi mereka yang tidak berpeluang untuk menunaikan rukun Islam yang kelima itu pada tahun ini, maka mereka digalakkan dan disunatkan agar melaksanakan ibadah korban. Korban yang dimaksudkan ialah menyembelih haiwan yang terdiri daripada unta, lembu, kerbau, atau

kambing dengan tujuan untuk mendekatkan diri kepada Allah *subhanahu wata'ala* pada Hari Raya Aidil Adha.

Sesungguhnya, Hari Raya Aidil Adha tidak dapat dipisahkan daripada ibadah korban. Sebabnya, menyembelih haiwan dengan maksud untuk berkorban ini hanya boleh dilakukan bermula dari terbitnya matahari pada Hari Raya Aidil Adha setelah berlalunya tempoh masa yang mencukupi untuk dua rakaat solat dan dua khutbah sehingga hari tasyrik yang terakhir iaitu 13 Zulhijjah. Galakan untuk melakukan ibadah korban ini termaktub di dalam al-Qur'an melalui firman Allah *subhanahu wata'ala* di dalam surah al-Kautsar, ayat 1-3 :

إِنَّا أَعْطَيْنَكَ الْكَوْثَرَ (١) فَصَلِّ لِرَبِّكَ وَأَنْحَرْ (٢) إِنَّ شَانِئَكَ هُوَ الْأَبْتَرُ (٣)

Maksudnya : *Sesungguhnya Kami telah mengurniakan kepadamu (wahai Muhammad) kebaikan yang banyak (di dunia dan di akhirat). Oleh itu, kerjakanlah solat kerana Tuhanmu semata-mata, dan sembelihlah korban (sebagai bersyukur). Sesungguhnya, orang yang bencikan engkau, dialah yang terputus (dari mendapat sebarang perkara yang diingini).*

Berdasarkan kepada ayat tadi, majoriti ulama berpendapat bahawa hukumnya adalah *sunat muakkad* iaitu sunat yang sangat dituntut. Tarafnya lebih tinggi daripada sunat biasa, manakala nilai pahalanya pula lebih besar. Oleh itu, dapatlah difahami bahawa ibadah korban itu sangat penting untuk dilaksanakan bagi orang yang

berkemampuan yang telah dilimpahkan dengan keluasan rezeki kepada mereka.

Kaum muslimin yang dirahmati Allah,

Berkorban dalam erti kata menyembelih haiwan itu adalah satu ibadah kepada Allah *subhanahu wata'ala*. Apabila sesuatu amalan itu dianggap sebagai ibadah maka sudah tentu banyak hikmah dan faedah yang boleh diperolehi daripadanya.

Antara hikmah yang paling unggul bagi ibadah korban itu selain daripada manifestasi pengabdian diri dan tunduk kepada Allah *subhanahu wata'ala*, ialah untuk menghidupkan erti pengorbanan yang besar yang telah dilaksanakan oleh Nabi Ibrahim *'alaih salam*. Ia berlaku ketika Allah *subhanahu wata'ala* mengujinya dengan perintah supaya menyembelih anaknya Nabi Ismail *'alaih salam*. Kemudiannya Allah *subhanahu wata'ala* telah menebusnya dengan suatu penyembelihan yang agung iaitu seekor *kibash* yang diturunkan oleh Allah *subhanahu wata'ala* dan memerintahkan Nabi Ibrahim *'alaih salam* menyembelihnya sebagai tebusan kepada anaknya. Semuanya berlaku setelah Nabi Ibrahim dan anaknya Nabi Ismail *'alaih salam* berusaha melaksanakan perintah Allah dengan keimanan yang benar dan yakin.

Peristiwa kepatuhan Nabi Ibrahim *'alaih salam* dan Nabi Ismail *'alaih salam* terhadap perintah Allah *subhanahu wata'ala* itu memaparkan kekuatan iman dan keteguhan mental yang perlu kita contohi. Mereka telah melakukan pengorbanan demi menjunjung tinggi perintah Allah *subhanahu wata'ala*. Sebenarnya, pengorbanan

menjadi ujian kepada umat manusia sejauhmanakah mereka itu beriman dan mengabdikan diri kepada Allah *subhanahu wata'ala* yang menjadikannya, yang memberi rezeki dan segala kurniaan yang tidak terhingga kepadanya. Firman Allah *subhanahu wata'ala* dalam Surah al-Fatir, ayat 3 :

يَا أَيُّهَا النَّاسُ أذْكُرُوا نِعْمَتَ اللَّهِ عَلَيْكُمْ ۖ هَلْ مِنْ خَلْقٍ غَيْرِ اللَّهِ يَرْزُقُكُمْ
مِّنَ السَّمَاءِ وَالْأَرْضِ ۚ لَا إِلَهَ إِلَّا هُوَ ۖ فَآَنَىٰ تُؤْفَكُونَ (٣)

Maksudnya : *Wahai umat manusia, kenangkanlah nikmat Allah yang telah dikurniakanNya kepada kamu; tidak ada sama sekali yang menciptakan sesuatu selain daripada Allah; Ia memberi rezeki kepada kamu dari langit dan bumi. Tiada Tuhan melainkan Dia, maka mengapa kamu rela dipalingkan (dari menyembahnya)?*

Selain itu, ibadat korban juga mengandungi pengertian pertolongan kepada orang fakir dan orang yang memerlukan pertolongan. Pemberian berupa daging korban itu dapat menambah rasa gembira kepada mereka, ahli keluarga dan tanggungan mereka pada hari raya. Dengan itu, akan lahirilah ikatan persaudaraan Islam yang kuat antara individu dalam masyarakat Islam dan dapat menanam semangat hidup bermasyarakat dan rasa kasih sayang ke dalam hati mereka.

Kaum muslimin yang dirahmati Allah,

Justeru, bersempena dengan kedatangan Hari Raya Korban pada esok hari, maka marilah kita sama-sama berusaha untuk mendekatkan diri kepada Allah *subhanahu wata'ala* dengan

melakukan ibadah korban. Bagi mereka yang mampu melaksanakannya pada tahun ini, maka berkorbanlah. Bagi yang belum mampu menunaikannya pada tahun ini, maka sama-samalah kita berusaha dengan cara menabung sedikit dari pendapatan kita pada setiap bulan sejak dari awal tahun lagi agar kita mampu melakukan ibadah korban apabila tiba masanya kelak, insya Allah. Marilah kita bersama-sama meraih ganjaran besar yang disediakan oleh Allah *subhanahu wata'ala* bagi orang yang melakukan ibadah korban. Daripada Zaid bin Arqam *radiallahu anhu* :

قَالَ أَصْحَابُ رَسُولِ اللَّهِ صَلَّى اللَّهُ عَلَيْهِ وَسَلَّمَ: يَا رَسُولَ اللَّهِ. مَا هَذِهِ الْأَضَاحِيُّ؟ قَالَ: ((سُنَّةُ أَبِيكُمْ إِبْرَاهِيمَ)) . قَالُوا: فَمَا لَنَا فِيهَا، يَا رَسُولَ اللَّهِ؟ قَالَ: ((بِكُلِّ شَعْرَةٍ حَسَنَةً)) قَالُوا: فَالْصُّوفُ، يَا رَسُولَ اللَّهِ؟ قَالَ: ((بِكُلِّ شَعْرَةٍ مِنَ الصُّوفِ حَسَنَةً)) .

Maksudnya : *Para sahabat Rasulullah sallallahu alaihi wasallam telah bertanya: "Wahai Rasulullah, apakah haiwan korban ini?" Baginda bersabda: ((Ini adalah sunnah bapa kamu, (Nabi) Ibrahim alaihissalam)) . Mereka bertanya lagi: "Apa yang kami akan perolehi daripada berkorban dengan haiwan tersebut, wahai Rasulullah?" Baginda bersabda: ((Pada setiap bulu ada satu kebaikan)) . Mereka bertanya lagi: "Bagaimana dengan suf (bulu biri-biri) wahai Rasulullah?" Baginda bersabda: ((Pada setiap bulu suf ada satu kebaikan)) .*

(Hadis riwayat Imam Ibnu Majah)

Kaum muslimin yang dirahmati Allah,

Jelaslah kepada kita, bahawa ibadah korban itu disunatkan oleh Rasulullah *sallallahu 'alaihi wasallam* sebagai satu latihan dan ujian bagi kaum muslimin untuk memupuk semangat berkorban dengan cara mengeluarkan sebahagian kecil nikmat dan rezeki yang dilimpahkan oleh Allah untuk dikongsi oleh golongan fakir miskin sekaligus menyerlahkan syiar Islam itu sendiri.

Sebagai kesimpulan, antara hikmat dan nilai-nilai yang terkandung dalam ibadah korban antaranya ialah :

Pertama : Melatih dan membentuk mentaliti kaum muslimin supaya sentiasa bersedia berkorban dengan sebahagian rezeki dan nikmat kurniaan Allah demi kepentingan orang lain.

Kedua : Sebagai salah satu cara mendekatkan diri kepada Allah sebagaimana yang sering kita ikrarkan dalam solat lima waktu; "*Sesungguhnya solatku, ibadahku, hidupku dan matiku adalah untuk berbakti kepada Allah subhanahu wata'ala*".

Ketiga : Menghidupkan sunnah Nabi Ibrahim *'alaihi salam* yang kemudian disunatkan oleh Rasulullah *sallallahu 'alaihi wasallam* menjadi syiar ibadah yang utama bagi kaum muslimin.

Akhirnya, marilah kita bersama-sama menghayati firman Allah *subhanahu wata'ala* dalam Surah al-Hajj, ayat 37 :

أَعُوذُ بِاللَّهِ مِنَ الشَّيْطَانِ الرَّجِيمِ. بِسْمِ اللَّهِ الرَّحْمَنِ الرَّحِيمِ.
لَنْ يَنَالَ اللَّهُ لُحُومُهَا وَلَا دِمَاؤُهَا وَلَكِنْ يَنَالُهُ التَّقْوَىٰ مِنْكُمْ ۚ كَذَٰلِكَ
سَخَّرَهَا لَكُمْ لِتُكَبِّرُوا اللَّهَ عَلَىٰ مَا هَدَاكُمْ ۗ وَبَشِّرِ الْمُحْسِنِينَ (٣٧)

Maksudnya: Daging dan darah binatang korban atau hadiah itu tidak sekali-kali akan sampai kepada Allah, tetapi yang sampai kepadaNya ialah amal yang ikhlas yang berdasarkan taqwa dari kamu. Demikianlah Ia memudahkan binatang-binatang itu bagi kamu supaya kamu membesarkan Allah kerana mendapat nikmat petunjukNya. Dan sampaikanlah berita gembira (dengan balasan yang sebaik-baiknya) kepada orang yang berusaha supaya baik amalnya.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ
وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ
قَوْلِي هَٰذَا، وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ
وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ
الرَّحِيمُ.

KHUTBAH JUMAAT KEDUA

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ لَعَلَّكُمْ تُفْلِحُونَ.

Kaum muslimin yang dirahmati Allah,

Marilah kita terus mengimarahkan masjid dan surau dengan menunaikan solat fardu secara berjemaah. Pada masa yang sama, pastikan rezeki yang kita peroleh adalah daripada sumber yang halal lagi baik. Suburkanlah rasa hormat dan taat kepada para pemimpin serta kasih sayang sesama masyarakat. Perkukuhkanlah perpaduan ummah demi kestabilan, kemakmuran dan keharmonian masyarakat di Sarawak. Selain itu, kita hendaklah bersungguh-sungguh menghindarkan diri dan ahli keluarga daripada terjebak dengan penyalahgunaan dadah dan perjudian, agar kehidupan kita selamat, bahagia dan sejahtera.

Pada hari yang mulia ini juga, marilah kita memperbanyakkan selawat ke atas Nabi Muhammad *sallallahu alaihi wasallam* seperti yang diperintahkan oleh Allah *subhanahu wata'ala* dalam Surah al-Ahzab, ayat 56:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا (٥٦)

Maksudnya: Sesungguhnya Allah dan malaikat-Nya berselawat (memberi segala penghormatan dan kebaikan) kepada Nabi (Muhammad sallallahu alaihi wasallam); wahai orang yang beriman, berselawatlah kamu kepadanya, serta ucapkanlah salam sejahtera dengan penghormatan yang sepenuhnya.

اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا صَلَّيْتَ
عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا مُحَمَّدٍ
وَعَلَى آلِ سَيِّدِنَا مُحَمَّدٍ، كَمَا بَارَكْتَ عَلَى سَيِّدِنَا إِبْرَاهِيمَ وَعَلَى آلِ
سَيِّدِنَا إِبْرَاهِيمَ، فِي الْعَالَمِينَ، إِنَّكَ حَمِيدٌ مَجِيدٌ.

وَارْضَ اللَّهُمَّ عَنِ الْخُلَفَاءِ الرَّاشِدِينَ الْمُهَدِّينَ، سَادَاتِنَا أَبِي بَكْرٍ وَعُمَرَ
وَعُثْمَانَ وَعَلِيٍّ، وَعَنِ الصَّحَابَةِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ.
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ وَيَا قَاضِيَ الْحَاجَاتِ.

Ya Allah! Bantulah saudara-saudara kami di mana sahaja mereka berada, khususnya di negara Palestin. Kurniakanlah kepada mereka perlindungan, keselamatan, keamanan, keselesaan dan kemenangan dalam menghadapi musuh yang sentiasa mengganggu mereka. Angkatkanlah dan hilangkanlah daripada mereka bala bencana, kesedihan, peperangan dan permusuhan dengan limpah rahmat-Mu, Tuhan yang Maha Rahmat.

Ya Allah, ampunilah dosa-dosa dan kesalahan kami, ibu bapa kami, ahli keluarga dan guru-guru kami. Limpahkanlah kesejahteraan, kedamaian dan kebahagiaan kepada kami semua dalam kehidupan di dunia dan di akhirat.

Ya Allah, Ya Rahman, Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Negara kami, khasnya kepada Seri Paduka Baginda Yang di-Pertuan Agong Malaysia, dan juga pemimpin-pemimpin Islam negeri kami, khususnya Tuan Yang Terutama Yang di-Pertua Negeri Sarawak.

Ya Allah, hindarkanlah kami daripada melakukan rasuah dan sifat terkeji yang menyeleweng daripada peraturan dan undang-undang negara. Jauhilah kami dan keturunan kami daripada penyalahgunaan dadah. Jadikanlah kami ummah yang berkualiti, berintegriti serta cemerlang demi mencapai negara yang aman dan makmur serta mendapat perlindungan-Mu, ya Allah.

Ya Allah, Ya Dzal Jalali Wal Ikram! Ya Allah, kukuhkanlah perpaduan dan kesatuan kami dengan pegangan Ahli Sunnah Wal Jamaah dalam seluruh nilai kehidupan kami. Limpahkanlah ke atas kami nikmat keselamatan, kesihatan dan keafiatan serta hindarilah kami daripada segala wabak penyakit dan kesempitan hidup.

رَبَّنَا أٰتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. اٰمِيْن،
اٰمِيْن يَا رَبَّ الْعَالَمِيْنَ.

عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ. وَإِيتَاءِ ذِي الْقُرْبَىٰ وَيَنْهَىٰ عَنِ
الْفَحْشَاءِ وَالْمُنْكَرِ وَالْبَغْيِ. يَعِظُكُم لَعَلَّكُمْ تَذَكَّرُونَ. فَادْكُرُوا اللَّهَ الْعَظِيمَ
يَذْكُرْكُمْ. وَاشْكُرُوهُ عَلَىٰ نِعَمِهِ يَزِدْكُمْ. وَاسْأَلُوهُ مِنْ فَضْلِهِ يُعْطِيكُمْ. وَلَذِكْرُ
اللَّهِ أَكْبَرُ. وَاللَّهُ يَعْلَمُ مَا تَصْنَعُونَ. أَقِيمُوا الصَّلَاةَ.